

## ■ GLOSSA

# Brevetaziuns

DA SILVIO CAMENISCH

Las pretaisas creschan en baselgia, scola e famiglia. Jau auz tuttas trais sin il medem podest e surdun ina trofea da capricorn medem gronda a tuttas trais victuras. Qua sun jau precaut e sai pertge. Pli gugent esser cun tuttas tuttina e preferir naginas. Numn'ins betg quai pragmatissem? Auf Erfahrung beruhend. N'emporta nagut. Igl è rut or ina malsogna moderna cun privel d'infecziun. Brevetitis. Tut vegn pretendi e lubì be pli cun buns mussaments. Ils ins numnan quels palpiris diplom, ils auters patenta u brevet. Noss chatschadurs e pestgaders, tranteren sa chattan fitg valabels Settembrinis ed apostels, èn en possess da patentas legalas. I dat collectaders passiuads



da tals palpiris. Mia veglia patenta da pestgader (d'avant 2004) è tuppamain scrudada. Jau stuess renovar ella en C., uschiglio na dastg'jau betg sa numnar pli pestgader la proxima sesiun.

Tuts magisters da nossa scola manada han stuì far in brevet

per spendrar uffants che nodan e tut segund najan. Tranteren era mammas. En cas da basegn stuessan quels en privel da vita be clamar nus brevetads, lura fiss lur spendrament da manaivel. Quai è patent e fa senn, era sche la magistraglia sto curre mintga weekend a curs da brevetaziuns, jau ditg tranteren absurdas. Brevetaziun per dastgar laschar ir uffants en tualetta persuls. È in en sazez bun magister betg en possess dal brevet da salvavita, na dastga el betg ir pli cun els sper l'aua. In pitschen aualet pudess esser in risico, ed era sch'i pluvev cur che l'uffant turna da scola a chasa. Tals gronds riscos da responsabladad na savain nus betg responder, era sche nus dastgain grazia a nossa bella clamada responder uschiglio tut.

La proxima fin d'emna, che Lavegn a sa numnar weekend en scolas e scolinas rumantschas dal futur da manaivel, faschain nus in brevet da brassar servlas. La magistraglia tant dal Grischun sco dal rest da la Svizra sto esser brevetada e savair sa documentar en l'art da grillar. Quai tut pretendan concepts intelligents che sa numnan HarmoS. Ina bunischima chaussa. Dabot fissan bunas liongias brassadas tut nair da fulin, cun laschar ir vidlonder uffants. I pudess sa resultar cancer ordlonder. Quai na sa mai esser liongia a nus magisters, anc main als experts und ihrer stolzen Konzeptmacher. Gliez è clerischem, era sche bler auter è detg stgir.

Quest onn faschain nus pauc scolasts tranter bleras sco-

lastas il champ da Pasca sin l'Albisgüetli. Tuts e tuttas vegnan brevetads da chantar degnamain il psalm svizzer. Ina cussegliera naziunala precauta vul introducir l'obligatorium en ils plans d'istrucciun. En vista al campiunadi europeic da ballape ed il clima sa midà in basegn dal temp. Mintga di da scola, da lavur u vacanza en la regiun turistica, stuess entschaiver e finir cun l'imni svizzer. Quel vegn chantà be en ina partida burgaisa fitg observanta, ma stuess penetrar en la schientscha e conscienza da tuts individis. Cun ina brevetaziun obligain nus l'emprim la magistraglia, tranter lur muntera datti inqual nursa naira dal diavel. Nagina panica, qua clamain nus il meglier noss agen exorcist brevetà.